

**REGIONAL NEWS BULLETIN
HEADLINES (EVENING)**

Date – 31/01/2025

Time - 18:30 Hrs

1. Governor Gen Retd (Dr) Vijay Kumar Singh an vawiin khan Aizawl Durtlang North-a BSF Sector Headquarter tlawhin BSF Officer leh sipaite a kawm.
2. Kum 2025 -2026 inkara Mizoram State budget tur chu March ni 4 khian Chief Minister, Finance changtu Pu Lalduhoma'n sessionah a pharh ang.
3. President Draupadi Murmui chuan khawvel dinhmun nghet lo leh buai tak karah India sum leh pai, mipui mimir khawsakna leh politics dinhmun a nghet tha a ti
4. National Games Uttarakhand-a neih mekah Nazaretha Lalthazuala'n Wushu ah Bronze meddal a la a, Mizoram tana Medal la thei hmasa ber a ni.

<><><>

GOVERNOR

Governor Gen Retd (Dr) Vijay Kumar Singh an vawiin khan Aizawl Durtlang North-a Border Security Force (BSF) Sector Headquarter tlawhin BSF Officer leh sipaite a kawm.

Governor chuan India leh Bangladesh ramri vengtu BSF te hmalakna fakawm a tih thu a sawi a, India ram a him zel theih nana theihtawp chhuah turin a chah a. Mipui himna ngaipawimawh tur leh ramri kaltlanga dan lova hmalaknate uluk taka veng tura chahin, mipuite tana luanchhuahna thawh kawngah tan la zel turin a chah nghal bawk.

Governor hi DIG, Sector Hqrs. Pu Kalyan Kanti Majumdar leh a thawhpuite'n lo dawngsawngin office leh Composite Hospital-te an fanpui a. Mizorama BSF hmalakna leh hmachhawpte PowerPoint presentation hmangin an sawifiah bawk.

BSF te hian Mizoram bikah hian India leh Bangladesh ramri 318 Km vela thui ven hna an thawk mek a. Sector Hqrs. Aizawl hnuai hian Unit 4 a awm a. Service company 24 awmin, tun dinhmunah Border Out Post (BOP) 58 an vil mek a ni.

<><><>

BUDGET SESSION

Mizoram Legislative Assembly budget session, thla thar February ni 19 atanga tan tur chuan March ni 20 thleng a awm ang.

March ni 4 ah Chief Minister leh Finance Minister Pu Lalduhoma'n kum 2025 atanga 2026 inkara Mizoram State budget tur a pharh dawn a ni.

Assembly Speaker Pu Lalbiakzama kaihhruai Business Advisory Committee (BAC) thukhawmin a rel angin Session tan ni ah hian Larsap Gen Rtd Vijay Kumar Singh an thu a sawi dawn a, Session hun chung hian zawhna leh chhanna bakah Minister Demand te leh Sawrkar bill pawimawh hrang hrang pass tuma sawiho a ni ang.

Assembly atanga thudawn danin tun dinhmunah session chungah sawiho tur Bill pakhat a lut tawh a, Bill dang hi a luh zel beisei niin zawhna pawh luh belh zel beisei a ni.

Tuna sawrkar kum hman lai mek kum 2024 leh 2025 inkar atana budget cheng nuai sing 1 & 4276 chu nikum February ni 27 khan Chief Minister leh Finance Minister Pu Lalduhoma chuan a pharh a, kumina budget hi pung hret tura ngaih a ni.

<><><>

LALREMSIAMI

Mizo Hockey player Lalremsiami'n Mizorama hockey in hma a sawn theih nan Mizorama District Association hrang hrang hnenah Hockey stick tha chi leh ball 120 a pe.

Aizawla Hockey Mizoram office, Tuikhuahtlangah nimin khan thilpek hi hlan a ni a, India Senior team tan vawi 156 a khelh atanga Goal 31 thun tawh Kolasib nula Lalremsiami Hmar chuan kum 2036-a India in Olympic Games thlen a tumna thlir chungah thil ti ani a ti a, Mizoram hockey in hma a sawn zel theih nan leh India in Olympic a thlen chuan Mizo a tam thei ang ber tel se a duh tih sawiin Hockey chu hnam dang khelh tur chauh niloin Mizote tan kawng a awm tih hriaa theihtawpa pen chhuak turin thlalaite a chah bawk.

Lalremsiami chuan Mizoramah Hockey in hma a sawn zel theih nan Khelmual an mamawh tam hle a ti a, District tinah awm thei se tun aia hma an sawn chak zawk a beisei tih sawiin state chungah phul phah chungah inkhelh theihna hockey khelmual

pathum chiah a awm chungin tun dinhmun an thleng thei a ti a, Mizo naupang tuizia leh nuam an tihzia a hmuhin phurna a pe tih sawiin Muallungthu-a Hockey khelhna hmun phul phah chu tha hle mahse tui pekna a awm loh avangin chhiat mai a hlhauwm a ti a, tun aia tha zawka enkawl ni se a duh tih a sawi bawk.

Kumin January 26 khan Hockey India buatsaih Womens League vawi khatna khelh zawh a ni a, Lalremsiami hi Rarh Bengal Tigers tan khelin thla khat pawh tling lo chhungin Rs nuai 25 a hlhauwm a, a sum hmuh atangin Mizoram hockey tanpuina atan a luangchuak a ni. Lalremsiami bakah hian Bengal Tigers team-ah Mizo pahnih Marina Lalramnghaki leh Lalrinpuii Pachuau an tel bawk a ni.

Mizoramah District zingah Khawzawl tih loh District dang 10 ah Hockey Association din a ni a, District tinah hian Lalremsiami chuan Flush company-in ama puala a bika an siamsak, a hmung leh a jersey hak thin number 20 chuanna Hockey stick 20 theuh a pek bakah Ball 12 zel a hlan tel a, Hockey stick leh Ball a semchhuah hlutzawng hi a vaiin cheng nuai 7 leh sing 6 vel a ni.

<><><>

CM

Chief Minister Pu Lalduhoma'n Chhungkua leh laina induhsakna uchuak awm thin tihtawp nan Integrity Pack khauh takin kenkawh a ni dawn a ti.

Power & Electricity Department, Commerce & Industries leh Printing & Stationary Department Review Meeting vawiina Secretariat Conference Hall-a neih a hmanpui na ah he thu hi sawiin Chief Minister chuan GST pe lo contractor leh supplier an awm an phal dawn lo a ti a, Aikal lak avanga harsatna titawp turin Service Review Committee dina hma la turin Department hotute chahin chhawr tlak loh hnathawktute chu pension tha tawh tak nena chawltir a, chhawr tlak hnathawktu lak mai tha an ti tih a sawi a, hun vawng dik turin sawrkar hnathawkte an phut a ti bawk a, thawktu indaih lehzuala awm theih nan e-office uar an tum a, System thar, mipui tana tha zawk an duh a ti a, Mi tlem te hamthatna aian mipui hamthatna an rilru ah lian ber se a duh tih a sawi bawk.

Chief Minister chuan Corporate Social Responsibility CM office atanga centralise chu CSR zawng zawng thunun tumna a ni lo tih sawiin tam zawk leh hlawk zawka CSR an hmuh theih nana intanpui tawna tur zawk a ni a ti a, Sawrkar hmalakna hlamzuih leh chhawr lohva riral zui ta a tam tih sawiin fir taka hnathawh enkawl turin thawktute a chah a, sum leh pai enkawlna kawngah one department one bank system kalpui an tum thu a sawi bawk.

Pu Lalduhoma chuan Factory-ah bungraw mamawh direct-a lei a, sum leh pai tlem zawk senga hmalakna tam zawk neih theih dan tur an dap mek tih sawiin Mizoram tharchhuah ngai hlu a, a pun belh zel theih nana hma la zel turin kalkhawmte a sawm a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

PRESIDENT

President Draupadi Murmui chuan khawvel dinhmun nghet lo leh buai tak karah India chuan sum leh pai, mipui mimir khawsakna leh politics ah nghet taka dingin khawvel entawn tur a chhawp a ti. Parliament in hnih member thukhawm hmaah vawiin khan President Murmui chuan he thu hi sawiin hun lo kal zel turh chhuan lo awm turten India chu kum 2047-ah chuan ram chak, theihna nei tha leh hausa takah an siam ang a ti.

President Murmu-i chuan a sawrkarin hmasawna kawngah chak takin a kal tih sawiin mipuiten hamthatna an chan vek theih nan insiamthatna, hna thawh that leh inthlak danglamna hmathlira nei chungin an kal zel a ti.

President Murmu-I chuan kum hmasa lamah ram hmasawna tura sum dah capital expenditure chu cheng vaibelchhe nuai 11 chuang anih thu sawiin hei hi ram chanchina a la tam ber a ni a ti a.

<><><>

ECONOMIC SURVEY

Union Finance Minister Nirmala Sitharaman-i chuan kum 2025 ah ram sum dehchhuah zaa 6.4-a pung tura chhut anih thu a sawi. Vawiin khan Pi Sitharaman-i hian Economic Survey hi Parliament-ah a pharh a. Agriculture leh service sector-te hnathawh avangin ram sum leh pai dinhmun chuan nghet takin hmasawn lam a pan zel a ti a. Survey-a tarlan anih danin thil siamchhuahna manufacture sector lamin hniam lam an pan hret tih sawiin hei hi khawvel huapa thil thlengte leh tualchhung dinhmunin a nghawng a ni a ti baw. Economic Survey hi ramchhung eibar dinhmun thlirlawna leh hun lo kal tura a dinhmun thlirlawna a ni a. Department of Economic Affairs hnuai Economic Division ten Chief Economic Advisor kaihraina hnuai an buatsaih thin a ni a. Naktuk hian Union Finance minister hian Union Budget 2025-26 house ah a pharh leh ang.

<><><>

NATIONAL GAMES

National Games vawi 38-na Uttarakhand-a neih mekah Mizoram tan Nazareth Lalthazuala'n Wushu ah Bronze medal a la a, Mizoram tana Medal la thei hmasa ber a ni.

Zemabawk East tlangval Nazareth Lalthazuala hi Wushu (under 56 kg) huangah a khel a, bronze medal a la ni. Nazareth Lalthazuala hian pre-quarter bye-in quarterfinal a lut nghal. Quarterfinal-ah hian a thlengtu Uttarakhand tumin game a thunun hneh hle a, round hnih bak khelh ngai lo in a chak a, semifinal-ah Punjab mi a hmachhawn leh a, 6-5 in a vanduai zawkah a tang a ni.

National Games hi Uttarakhand District 8-ah thlen darh tir a ni a. Discipline tam zawk chu an khawpui Dehradun-ah nghah a ni a. Mizoram qualify-na sports discipline pawh khaw 4-ah sem darh a ni a. Dehradun-ah hian Archery, Athletics, Weightlifting, Wushu leh Judo te an khel a ni.

Mizoram Contingent-ah hian Mizoram atangin National Games ah player 66 an kal a, Discipline 12 ah inelna an hmachhawn dawn a, Technical Official, Coach leh Manager 20 kal nen a vaiin Mizoram Contingent mi 94 National Games ah an kal a ni.

Deputy Chief De – Mission Pu Joseph Thansanga chuan an beisei danah Taekwondo, Football, Hockey, Boxing, Judo leh Weightlifting ah Medal lak ngei an inring a ti a, Gold la tur chuan vanduai leh vanneih inkar anih avangin chian a har tih sawiin Gold 4 atanga 5 vel la turah an in beisei a ti a, Category 27 ah Medal lak theihna an nei tih sawiin an vanduai anih loh chuan a pumpuiah medal 10 vel lak theih an in beisei tih a sawi baw. Pu Joseph Thansanga kan kawmna lo ngaithla ang.

<><><>

PM

Prime Minister Narendra Modia chuan Budget Session lo awm tur chuan kum 2047-a ram changkanga India siamna turah inrintawkna a pe ngei ang a ti. Vawinah chanchinbumite hmaah he thu hi sawiin Pu Modia chuan kum 2047 ah chuan India chuan zalenna aneih atangin kum 100 a tling tawh ang a. Viksit Bharat-a a thil tum te a ti hlawhtling tawh ang a ti baw.

<><><>